

26. januar 2015

UPA2015/54

Inatsisartut suleriaasianni § 33 naapertorlugu matumuuna Inatsisartut aalajangiiffigisassaattut siunnersuut imaattoq saqqummiuppara:

Upernaviup eqqaani nunaqarfimmi Kullorsuarmi timersortarfiliornissamut Naalackersuisut AIS 2016-mut 25 mio. koruninik immikkoortiteqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut Ilaasortaq Hans Enoksen, Partii Naleraq)

Tunngavilersuut:

Nunaqarfik Kullorsuaq ineriartorpoq inuttusiartuinnarlunilu, aalisarnikkummi piniarnikkullu periarfissat ajunngilluinnartumik ineriartoqqinnissamut periarfissaqartitsipput, - tassa naatsumik oqaatigalugu Nunaqarfik Kullorsuaq ineriartortinneqarnissaminut ajunngilluinnartumik inissisimavoq. Ineriartortitsinissap pineqartup piviusunngortinneqarnissaa isumannaarsinnaajumallugu, ilaatigut nunaqarfiup meerartaanut inuusuttortaanullu tunngatillugu, innuttaasut ulluinnarni periarfissaat nukittorsartariaqarput, Kullorsuarmut naleqquttumik, - aamma sunngiffimmi sammisassaqaartitsineq eqqarsaatigalugu.

Kullorsuarmi timersortarfimmik sanasoqarnissaa pinngitsoorneqarsinnaangilaq, minnerunngitsumik Kullorsuarmi meerarpassuit inuusuttorpassuillu eqqarsaatigalugit, soorlutaaq eqqumaffigineqartariaqartoq innuttaasut inersimasut periarfissaat assut killeqarmata. Taamaattumillu Kullorsuarmiut periarfissaat pitsaanerulersinneqassasut kissaatigigaanni, innuttaasut sunngiffimminni periarfissaat timersortarfiliornikkut pitsanngorsarneqartariaqarput.

Ulluinnarni Kullorsuarmi nunaqarferujussuarmi periarfissat naammaginangitsorujussuupput. Meeqqat sunngiffimminni ornittagaat tassaavoq atuarfikoq, ullutsinnut naleqquttuunngilluinnartoq, aserfallassimaqalunilu, - naatsumik oqaatigalugu, najortagaq atorsinnaangivissoq meeqqanut nunaqarfimmiunullu allanut neqeroorutigineqarpoq.

Aamma taamatorluinnaq ipput inuusuttunut periarfissat. Kullorsuarmi periarfissat killilerujussuupput. Naallu atuarfiup eqaarsaartarfia inuusuttunut iluaqutaagaluaqisoq, atorneqarsinnaassusia killeqarpoq, soorunami meeqqat atuartut eqaarsaartarfimmik atuinissamut salliusussaammata.

Taamaattumik Kullorsuarmi timersortarfimmik sanasoqarnissaa pinngitsoorneqarsinnaanngilaq, nunaqarfik taanna ineriartornermi katakkiartuinnarsinnaannginatsigu. Meeqqat inuusuttullu najugaqarfinni allanisulli qaamasumik ineriartornissaminut periarfissaqassappata Kullorsuarmi ullutsinnut naleqquttumik timersortarfiliornissaq akuersissutigisariaqarparput.

Siunnersuutip aningaasaqarnikkut allaffissornikkullu kingunerisassai:

Kullorsuarmi timersortarfimmik sanasoqarnissaa nunatta karsianut 25 mio. kr.-inik aningaasartuuteqarnerunissamik kinguneqassasoq naatsorsuutigineqassaaq. Aningaasartuutaasussanik naatsorsuusiordermi tunngavigineqarpoq nunatta avannaani taamatut sanaartorneq aningaasartuuteqarfiunerusussaammat.

Timersortarfimmik pineqartutut sanasoqarnera ingerlatsinermit aningaasartuutini aamma kinguneqassaaq, kommunip ingerlatsinermit aningaasaliissutaasigut nassaarineqartussanik. Naatsorsuutigineqarpoq ingerlatsinermit aningaasartuutit 500.000 kr.-it missaannik ukiumut annertussuseqartassasut.

Siunnersuutip aningaasarsiornikkut allaffissornikkullu namminersorlutik inuussutissarsiortunut kingunerisassai:

Kullorsuarmi timersortarfimmik sanasoqarnerata nalaani suliffissanik pilersitsisoqassaaq, taamalu namminersorlutik inuussutissarsiortunut aningaasarsiornikkut pitsaasumik kinguneqarnissaa naatsorsuutigineqarluni.

Siunnersuutip aningaasarsiornikkut allaffissornikkullu innuttaasunut kingunerisassai:

Timersortarfiup ulluinnarni Kullorsuarmi ingerlanneqarnerani naatsorsuutigineqassaaq tamanna suliffissamik nutaamik pilersitsissasoq.